

Kemtuik Go Mamnebut

(Dongdeng-dongeng dari daerah Kemtuik)

Buku Bacaan
Bahasa Kemtuik
Papua, Indonesia

KemtuiK Go Mamnebut

(Dongdeng-dongeng dari daerah KemtuiK)

Materi Muatan Lokal (MULOK)

Disusun oleh:

Jacob Bemey, BTh, SSi
Jaap van der Wilden, MA

Penerbitan buku ini didanai oleh
Oikonomos Foundation, Belanda

Edisi Kedua 2006

© Hak Cipta SIL, International Regional Papua
Dilarang memperbanyak buku ini untuk tujuan komersial.
Untuk non-komersial, buku ini dapat diperbanyak tanpa izin dari SIL, International

2006

SIL International Regional Papua
Indonesia

KATA PENGANTAR

Buku ini pernah ditulis oleh Bpk Yakob Bemey atas petunjuk Bpk J.J. van der Wilden, dari SIL – International di tahun 1980. Sebabnya, edisi yang pertama sudah menikmati oleh orang banyak, edisi yang kedua sudah dicetakan. Buku ini berisikan ceritera-ceritera dongeng yang disampaikan oleh orang-orang Namblong, Klesi, Kemtuik (Nimboran, Kemtuk / Gressi).

Tujuan penulisan buku ini adalah memperkenalkan bahan-bahan bacaan yang ditulis dalam bahasa mereka sendiri. Orang Kemtuik adalah satu suku yang berdiam di sepanjang aliran sungai Grime yang sering disebut Lembah Grime-Nawa. Lokasinya terletak di sebelah selatan dan barat Danau Sentani, di pantai utara provinsi Papua. Batas wilayah bahasa berbatasan dengan suku Elseng, Sentani, Tabla dan Nimboran. Orang Kemtuik berbahasa Kemtuik dan rumpun bahasa ini mempunyai empat (4) dialek, yaitu: Kemtuik, Klesi, Mlap dan Moi. Dengan semua dialek termasuk ada 11.000 orang yang bisa menggunakan bahasa Kemtuik. Teks buku ini disusun juga dalam bahasa Indonesia dengan demikian berguna juga bagi mereka yang belum memahami bahasa Kemtuik. Semoga buku ini membantu banyak orang.

DAFTAR ISI

1. Betedon ey Demanon ey Bu lo lek go nogo.	2
2. Leme nogo	9
3. Uduo ey sedue ey go nogo	15
4. Wop so memlak go nogo	21
5. Demu Kabui Nalo nogo.	23
6. Woy iram	32
7. Dame idam	??
8. Tercamahan di dalam bahasa Indonesia	??

1

Betedon ey Demanon ey bu lek go nogo.

Sedue klaya duo nemot go danon ey denun ey wawi go gemang klong ulu buo-so. Nggano nglangin blo no klak won go, ulu gemang buo-ton. No, nglangin lo ulu blo

sik so sa blue pu-biwon go. Nggano sa pupu.....bu klak go, denun ey danon ey golo usi go: “Aya, bu nago yam so? Sa bu tong-a! Bu kui yam sogo!” Nggano nglangin lo pu go; mot namon suing-a, genam mea li lo.

Ngganemot no bu yam so nemot namon saguip go, nemot namon bu lo lek. Bu lo lek go, klong go demanon wagon sengin blo no lit, betedon lo ngge kalik so duiding: e.....genam go kabuisro nago no mo lit, bu lo mo lek ya bung? Nggano demanon lo duing go: e.....genam go kemdet bu lo mo lek. Nggano betedon lo iseguon sengin tuot go, betep go, e.....demanon mit no pung. Nggano betedon gemang duing e....at go kabuisro wagon blo no ba klak.

Bu yam so sosok gono, li-klenatun go, nggano betedon lo pu go: e.....imot ten tra go, sogo-a ya dam? Nggano nemu iti go, e.....ngga sogo dop? Kim dop, nagui dop, ngga daguit dop, ngga wot dop, ngga luim dop, pen-kletenatun.

Nggano nemot klong go, ikum go, e...no buen dop ba! Tandali koklong gemang ikum dali, ngga nagui dop, kim dop, nagui dop klong go, kim mit no pung, e...no kim ba. Nggano demanon lo pu go betedon no: mot lo se klak go buo. Kim nemot klaya dato, kabung nalo lo yay suisuing go. Nemot namon wom so buo sogoso duiding, nemot namon ten kangok so mo tra.

Ngganemot sogoso kim nemot klak go buo go, kim klaya banim kenong.

Ku ngganemot no kabung nalo kim ikum so klong go, nggano nemot go tamot no pu go: a, at go kim nando lo bubuo? Genam go kim klong ikum, no, nemot lo nemot go mantaton no pu go: mot li go, klong ikum-a.

Betedon, demanon, suali sogoso, demanon nevo ut ba no, betedon kim blo no son.

Ngganemot kalik so sesemu, nggano kabung nalo nemot tang so gemang li go klong. Kabung nalo lo pu go: e....genam lo ya ikum nalu go. Kabung nalo lo mantaton no gemang usi: kay domdat mo ikum? Nggano nemot go mantaton lo pu go: ikum go se, genam kua senong.

Nggano kabung nalo lo pu go: e.....at-a nalu go mea suing kim nuik ba no, nando lo bubuo?

Ngga ey nemot-a kim nuik ba no son-natun go bubung. Ngganemot no nemot lo denok ngganemot ikum go, kim blo no. Mot nando? E.....mia, at lo be. Maning suey so pu! E....., asi genam lo, babu genam lo.

Nggano kabung nalo lo pu go: Genam ngge mot go babu. Mot sogo so semu tegoy?

Genam aya lo bu no itak go, ten kua dam, nemot lo wawi go e.....bu noklong go, nggano genam bu no itak-nawon. Aya lo sa blue pu go, genam bu lo lek go kabuisro wagon no lit, genam isewon no lit. Genam namon ten kua dam!

Nggano kabung nalo lo pu go: Weng! Imot yap ba no ya klong. Nemotnang klong go, yap ba no klak go, kabung nalo lo ten leguit go, nemot u-a gemang kluo-ton. Nggano kabung nalo usi go: mot sogo u so kluo-tegoy? Nemot lo pu go: genam go kabuisro u so kukluo. Kabuisro nevo ut ba no mang itak. At nemot u so be.

Nggano kabung nalo lo pu go: o, klong, wawi-nalo ya. Ngga no nemot li go, klong go, demanon nemot wawi go, weng go, yap ba no klak go, nemot namon suing go, tendam-klenatun go. Klay gono!

Nggano kabung nalo lo pu go: mot namon ngge no ya suing? Babu genam ngge no mea suing, nemot namon lo pu go.

Ngganemot no nemotnang kabung nalo lo yam so babu gono, nggano betedon no kabung nalo lo gemang pu-natun: mot ngge no se suing. Genam klong go mot nogo kabung wet so.

Nggano nemot klong go, kabung kua uwet. Nemot babu lo wamoy so mlue go.

Nggano nemot pung go, nemot lo pu go: genam kabung kua ikum, kam so uwet.

Nggeasui go genam kabung kua ikum. Utep, wadikua go, gono, mot namon koy tegek so se klong!

Nggano nemot namon ip-klenatun go, koy tegek so klong. Koy tegek go, pung gono, kabung nalo lo pu: nggeasui go kabung ngga, mot go kabung gemang. Mot kabung ngganemot-a se iti. Ngge mot go kabuisro mot tandali se iti, genam klong go, yakena-yakena no pung go, kabung mot nogo nang sogo kua ikum. Mot kabung ngge-a se iti!

Betedon ey Demanon ey, bu lo lek go nogo nebut ngge no yam.

LEME NOGO MAM NEBUT

Ku meno no kabung nalo leme buo sik so uweng, leme keba ey. Nggano denok meno kabung nalo nemot go yap seboy so suisuing, nemot kabung nalo ikum gono, dabui ta gemang tetegue: e.....genam go babu leme keba ey, e....genam go babu, leme keba ey....genam ey ya dam?

Nggano kabung nalo nemot lo ngge klik so gemang pu-tun: genam domdat kua go be. Domdat ey go sogo, genam go leme mang mo buo.

Nggano denok ngganemot lo pu go: e....., babu, no sogoso pu-to? Genam logo ulu blo kleng-kleng, semu blo kleng-kleng, di naklay blo kleng-kleng.

Nggano kabung nalo nemot lo pu go: domdat, koy-a puit-a imot go leme ya duik.

Utep so mot se klak-nalo. Ngge kubluik yaluim-natu go. Leme duik go yam so dam go, nggano kabung nalo nemot lo gemang pu-natun: utep so, mot se kundo! Wadikua seni se weng, wadikua klak sogo sagon eygo.

Wadikua seni denok ngganemot gemang kunwon, kabung nalo nemot mit no.

Wadikua seni kabung nalo leme temu duik go, ngganemot dam go, ngga ey nemot namon leme buo so gemang klong.

Leme mit no pung gono, kabung nalo denok ngge no nebut ngge kalik so geman pen-anatun: mot leme klak-bi logo, nemu blo sono kua yalap, son kui kin eygo blo so gemang.

Denok ngganemot leme klak-biwon go, nemot so bubuo, nggano nemu blo sono gemang yalap-biwon. E....., babu wamoy so ba mlue-natun, so-a kua, nemot-a denok go don mata so ba glung! Denok tiat nega go nemot-a babu lo ba teguok go dam-yum. Nemotnang go don ngge no mata so glung go be?

Denok ngganemot dabui ba suali se tra-ton, e....genam babu lo ya tebuet go dam-yun ba? No, genam sogo kalik so ya semu-lu? Nggano gemang duing-won: leme kangok dega go buo go, e....ket sono gemang betep-siwon!

Nggano denok ngge lo pu go: babu, genam go leme kangok go betep-silu go. Iti go, banom so se tui. No, ngganemot kateba kap go iti go, tandali leme nuik no pung.

Nggano leme kangok go meno buo-won go, e....pam luk ba lo gemang betep-siwon.

Pam luk ngganemot ba sogo son gemang gigit. Nggano denok lo pu go: e, genam go leme kangok go pam luk ba lo gemang kenong. Iti go, banom se se tui-nalo. Kabung nalo leme ngge nemot iti so pam luk ba lo degut-sategun gono, son tengin go, son lo nemot go saysuk yam so glok. Kabung nalo nemot so titemting, denok ngge leme blo sik sogo li go, nemot so yakena no kap-won. Yakena no pung gono, unen ey nglangin ey gono, gemang pen-abawon: aya ey, mia ey, genam kabung nalo lo leme buo so wawi go klong go, leme nuik no pung gono, ngge kalik so gemang pen-anatun: mot nemu blo sono kua yalap, son kui kin ey go leme kuit ba so gemang. Mot nemu blo sono yalap go, son lo mot mea glok!

Ngganemot sogoso, genam lo leme kangok go buo go, e...pam luk son kangok go ba no pui go, kabung nalo nemot son lo glok goso tetebing gono, genam leme blo sik sogo li go, gabe kap-natu. Nemot lo wamoy so mlue-natun go, nemot-a denok tiat go don mata so leme kuit blo no keduik go, git-tenatun.

Nebut nggenemot denok ngge go unen ey nglangin ey golo yakena sedue kabung naklay nogo yam so pen-klenatun.

Kabung nalo nggenemot pam luk ba sik so pung go, leme blo kam so ikum-tun go, e...denok ngge mo li go kap-won ba. Nemot leme ku sogo ngganemot-a yaluim go keba no sre go, nemot yakena no gemang bantuan.

Yakena sedue nebut ngganemot tup-nenawon gono, nemot nang lo pu go; utep go imotnang naklay klat so.

Wadikua nemotnang naklay klat so gemang klong lak. Klat yeyat, nebo klaya but-nenawon. Kabung naklay yakena seguong so, usu nogo kua klong.

Sedue nebo eygo yap no pung go, ten yam so dam go. Sedue-sedue nemotnang wadi nebut mo semu, utep so kabung nalo nggenemot koy no mea puit-eyon. Sedue temu lo koy tetegek, nggano sedue temu lo nebo wowok. Koy yam so puit gono, sedue-sedue lo denok tiat no gemang pu: motnang klong go, babu pu go, ngge no se weng. Denok tiat klong go, kabung nalo ngganemot pu go. Nggano kabung nalo nemot lo pu go: genam gowakay ya ba-ya, motnang lo iti go klong.

Nggano denok tiat nemot lo pu go: kua, ayanang lo pu go: babu nemot tang so se iti go banyum. Babu nogo sogo nebo-a ya iti? Nggano kabung nalo nemot lo pu go: e, ngga kalik go yua, genam ey!

Sedue-sedue nemotnang koy dali yam so puit-newon go, nggano kabung nalo nemot gemang bantuan. Nemotnang mit no pung gono, sedue-sedue lo ta lo mlak go, koy nebleng kangok go blo no puit-newon. Sedue-sedue lo pu go: mot denok tiat temu nago no itak-yo? Kabung nalo koy lo yam so kuim, nemot go nemu wi kenop, wi kaulang so yam so pling.

Leme nogo mam nebut ngge no yam gabe.

UDUO EY SEDUE EY GO NOGO NEBUT

Sedue lo nemot go yap kading no wep kualo go, wep ngganemot kangok so ip go. Nggano sedue lo uduo so ngge kalik so gemang pu-ton: ku no ku no mot bu mo tra mo, ngge no weng go se sot, imot go wep kangok sogo nggano kateba ut sogo.

Wep ngganemot ut gono, sedue lo iti go gemang duik-nawon. Wep yam so dasing go, nggano nemot go kuim yam so sengat-won go, nesip lo tegek go, nggano uduo lo ngge kalik so gemang pu-ton: genam no wep suk-a ma-ya! Nggano sedue lo pu go: mot lo nemot go suk seguong-a ya dam? Uduo nemu bubung, sedue lo wep suk yam so kualong go dam go, nggano wep ikum idi yam so dedam, nggano uduo lo gemang pu-ton: genam no wep ikum .idi ma-a! Nggano sedue wamoy so mlue-ton: ko namboy na-ya mea iti-lo! Sedue lo wep yam so dam, nggano uduo lo dabui ba lo ngge kalik so gemang duing-won: mot-a sreka wadi so lek go, beap no mea betep!

Ku kiklik, sedue boy puit go, dingpat sey go, nemot so sreka-won. Wadi nesip, uduo nemot go andua-andua deguo wet gono, nemotnang pung go, sedue ngganemot dingpat ey lek go, e....beap no betep genang so.

Sedue nggenemot lek go, nategun, tap no sedue ngganemot nemu pli-won go:.....no, genam ngge kalik so ba semu-newon. Nggano sedue nggenemot ip-won go, yakot so tegan blo lo klak.

Uduo lo dingpat ulue-a lek go natugun, beap keteng no pung gono, tagu ngge kalik so gemang i-nenawon: klaya, namon, nangglik, nggano dingpat beap no iti go, betep-nenawon. Nggano uduo meno lo gemang usi-tenawon: mot lo sogo kalik so tup-to? Nggano uduo meno lo pu go: genam lo ngge kalik so tup go: pang! Nggano meno lo pu go: kua genam lo ngge kalik so tup go: paw! Nemotnang ngganemot nebut so sok-neton, ten dedam.

Nggano maso meno kui kuo ey go, mesip so kunton, tap no sedue nemotnang lo dingpat ey lek nenawon go, tegan blo lo klak go gemang ikum-nawon. Ngganemot no maso kui kuo ey go naton, nemotnang mit no pung-anawon go, nemotnang ten so dam-neton. Nggano maso kui kuo ey golo, nemotnang no ngge kalik so gemang pu-ton: genam no ten temu ma-a! Nggano nemotnang lo pu go: sedue mot ey lek go weng, senang seguong so wadong-ton, nggano maso kui kuo ey go lo ngge kalik so gemang pu-ton: motnang lo genam no ten iti goso, genam go nebut motnang nogo mea pen-alu! Nggano nemotnang lo ten temu maso kui kuo ey gono gemang idok-nenawon. Nemot ten nggenemot dam gono, gemang pen-nawon: genam kuntugu, sedue di blo lo klak-tebawon go gemang ikum-batu. Maso lo sedue dingpat eygo lek go natun go.

Sedue lo wep uduo go nemu no yigot go dam goso, uduo lo maso deguo wet-won go. Maso nemot tandali bantugun, sedue nemot klak go mit no pupung, maso kui kuo ey go lo gabe pu-won: di ngge blo lo sedue gabe klak-won. Sedue ngganemot lo keklak, disuik guguk, nggano tegan ibot-biton dali!

Nemotnang sedue klak go sip no pung gono, nemu tong-neton nggano gemang ikum-newon, e....ngga go! Nggano maso kui kuo ey go lo pu go: genam lo mea klak. Nemot klak-biton, blo no yam so dedagu, nggano disuk ey guk go, nan blo no kenong. Ey, ey, ey, genam go kui kuo ey mo kening, nggano meno lo pu go: a, mot lo sogo kalik so klak-tegoy golo kenong? Nggano meno gemang klak-biton, blo no yam so se dedagu, tegan ey tong go ku no pui-won dali.

Ey, ey, ey, genam go masi nglabui ey mo tegek. Nemotnang lo kam so watam-neton, kua klak-nesewon. Sedue di blo so got-ton, nemotnang ku so got-neton.

Nggano meno duo lo ngge kalik so gemang pu-ton: imotnang kabuikin nebut, yasu nebut klulay-klulay nebut wamoy so ya mlue-etegon, sedue kunala duing sogo: ngge ku seni so gabe boblong, nemot li-ekunyon sogo. Nggano nemotnang wamoy so gemang mlue-neton.

Nggano sedue lo pu go: nemotnang wamoy so mlue-kletegoy go-a mang! Nando kua senong, genam go ku maning kua blong. Motnang lo duing go, motnang lo yasu nebut wamoy so mlue go, genam li sogo. Genam ya kua li! Maso nemotnang di nuik ba so got-neton, yasu nebut seni se tutuot, nggano sedue lo blo sik so pu-ton: motnang mo tup, genam go yasu nebut gemang tuot.

Ku yam so boblong, maso naklay tegang put ba, di put ba lo yam so degut. Uduo tegang put ba lo degut dali. Ku yam so blong gono, sedue di blo sik sogo li go, yakena no gemang klong. Yakena no pung go, sedue deguo yam so wet go, nggano gemang kutun lak. Di put ba lo degut go, tegang put ba lo degut go, tengang lo i-ibot, kuoy nebleng blo no kay seguong puit-neton. Di go seni so, uduo ngganemot wada toki ey truk go, koy blo no tui gono, nggano nemot lo ngge kalik so gemang pu-nawon: sedue ten so mo dedam go, kua wadong. Nggano sedue lo kua iti go, maso deguo wet go, dingpat ey kua lek go, beap nogo kua betep. Genam ngganemot sogoso nggeasui go gabe kekebong. Nggano sedue lo pu go: kebong-a!

Uduo ey sedue ey go nogo nebut, ngge no yam.

WOP SO MEMLAK GO NOGO

Ku meno no kabung klay duo gemang, wop mlak so klong go. Nemot so sui: Waling Nali.

Nemot wop so memlak gono, bu no lema lo gemang gluik. Nggano nemot go kenin kam so wet-ton, denun dato kap go, yakena no pung go, nemot lo gemang pen.

Nggano kenin lo pu go: genam go kabung bu no mo suing. Ngga ey nemotnang kutun lak go, bu dedegut, bu ba so kabung temoy iti go, e.....mu no tuet-newon.

No, wadi, Waling Nali go temoy tandali lema lo sok. Nggano lema lo nemot go saysuk dam-newon.

Yam.

DEMU KABUI NALO NOGO

Sedue meno nemot go denun dato ey duot kuon plo so gemang klong. Duot kuon yam so plo gono, nglangin lo denun no gemang pu-nawon: mot klong go, duen sua tung-salo! Imot go kuon dok sogo. Nggano denun dato duen ba idi no klong go semu duen sua so gemang tutung.

Nggano Demu Kabui nalo lo gemang bega: genam go duot nando lo bubuing? Nggano kabung denok ngganemot lo pu go: mia, genam lo wa! Nggano Demu Kabui nalo lo pu go: kua, suey so se pu! Babu genam lo wa! Ya....! Debui genam nemot so pu-

tu go gemang. Genam ngge mot go babu gabe! Mot go aya genam go duo gemang. Weng keda so babu ba kuadok! Babu masi don kua go.

Nggno kabung denok seguay golo Demu Kabui nalo gemang kuadok-natun. No, kabung denok lo pu go: babu, genam don kua go se! Nggano demu Kabui nalo lo pu go: kua, mot don kangok, se yu....usre ey se u wata klong! Babu don kua go.

Tap no tandali kabung denok lo pu go: babu, genam yam so u wakot go se. No, Demu Kabui nalo lo pu go: kua, yakena ngga go, ku ngap mang ikum. Nggano kenatugun, Demu Kabui nalo go yap no gemang pung. Yap no pung gono, demu ip semlea lui gono, gemang pupu: imot semlea ya dam go. Semlea dam gono, mang pu: domdat imot go naning duo ey duik, koy negu no. (nemot-a naning duo kua ngga demu guen) Kam so ta pui-tugun, naning duo dawin ey gigit, koy logo kua pegop. Nggano gemang pu-tugun: babu kua dedasing go se....A....sogo kalik golo ya bung?

Ku no ku no demu ip semlea-a lui go dam-kletugun, e...kabung denok yam so sek kekangok. Ikum-tun go, e...kabung denok ngge nemot go min pupung lo, nggano gemang mlue-tun: kay, babu, mot go sena ya wet go. Sena so wet-tugun gono, tawon lo wengkabui no king-situn go gemang tra, e.....no maning bu tom-a ba. yam so min pung gono gemang pu: kay, babu, mot go sena ya uwet go. Sena so uwet gono, tra-tun go.....e nemot-a maning dali ba. Ngganemot sogo gemang go-kletugun, e...kabung kaguit ngge yam so min se bebesik, nggano gemang pu: kay, mot go sena ya wet go. Sena so uwet gono, tra-tun go, e.....no yam so mo ba, ngge kalik go nogo tom ey gabe.

Nggano ngga utep gemang pen-tugun: mot banom go, sedue weng go be, ikum ey go. Mot keba ba no se degut go suing. Nggano kabung kabuit keba lo yam so pok-tun go, yap ba no itak-tun. Nggano Demu kabui nalo lo gemang pu: sedue mo usi go nebut kua tuet.

Nggano Demu kabui nalo wasut tung so ket dega no gemang klong. Wasut tutung keba nogo yam so damoy gono, temu srem so semu-natun gono, usre ey gemang bantugun. Nggano ngge kalik so gemang pen-bantugun:

e.....mot go min nakom, nando lo ya dam?

nando lo ya dam?

e.....mot go wengkabui ip, nando lo ya suom?

nando lo ya suom?

Ngganemot kalik so tandali-tandali gemang penbantugun.

Nggano nali kabung wala gabu blo sogo kama longsitun go gemang tup-situn.

Nggano Nali kabung lo pu go: e....ko pla tup! Demu Kabui nalo kabung kaguit ba wawiyum. Ngga penbantugun go:

e.....mot go min nakom, nando lo ya dam?

mot go min nakom, nando lo ya dam?

e....mot go wengkabui ip, nando lo ya suom?

nando lo ya suom?

Nggano Nali kabung wala gabu blo sik so keda so li-situn go, Demu Kabui nalo go yap no kap-situn go gemang usi: yap ba sogo nando?

Nggano kabung kaguit lo pu go: babu, at lo be! Nali lo pu go: kua, suey so pu-kundo! Nggano kabung kaguit lo pu: mia, at lo be! Nali lo pu: ya! Genam ngge mot go mia gabe. Mot go mia ey genam ey mesui klay gono tong go.

Nggano Nali kabung lo pu go: yatap tenuing-a, genam ya klak go. No, kabung kaguit lo pu go: esang, mia suop, genam ya kua pung go se.

Genam keba ba so got-tegu go se. Nggano Nali kabung lo yatap masi lo dak go, yatap trong. Nggano klak-bitun go, keba yam so pla gono, gemang pu: klong seben suk, klong guk! Kabung kaguit kap go, seben suk guk go, seben suk kin ya yam so bu tegot ba no sik-kletun go, nggano keba lo seben kin bu tegot ey go, pok go gemang itak. yatap tandali kadun go, nggano kabung kaguit ey Nali kabung ey wala gabu blo no gemang klong go klak-klenatun. Walo blo sik so nali lo gemang pu: ko tup! Demu Kabui nalo ngga pepen weng go:

e.....mot go min nakom nando lo ya dam?

e.....mot go wengkabui ip, nando lo ya suom?

Kabung kaguit tup-situn gono, suali tra-tun gono, gemang pu: esang, mia, mot lo genam nakua klong go wawi go, genam nggeasui Demu Kabui nalo lo gemang mo dam. Nggano Nali kabung lo pu go: mot demu koy mo dali se duik! Nggano kabung kaguit lo demu koy no dali duik-tun go, got-kletugun, Demu kabui nalo go nebut kama-a tui-tui.

Demu Kabui nalo kuntugun, e....yap no pung go, wasut keba ey go dia no betep go, gemang platebok-bitun, yap ba no. Sagom yali ey lek go, keba pok go, gigit go, kay seguong –a sagom yali lo but-situn.

Dan namon sogo tete wik-situn go, bu togut bu gemang pi! Nggano Demu Kabui nalo lo pu go: ya! Ngge bu gemang poplo. Da nangglik tete kong go wik-situn go seben kin gemang pi: pat...pat...pat...

Nggano Demu Kabui nalo lo duing go, keba meno plet go, meno plet go, meno plet go, kunala duing-tugun: kay, sogo kalik so lemoy-atun? Nemot nando lo mo wawi-won, genam wasut-a tebadali mo tung?

Nggano sagom yali lek go: wak ey gemang kapsitun, Nali mit no. Nali kabung go walo gabu mit no pung go, wala gabu gemang tutuo. No, Nali lo blue pupu golo, tandali sesegoy. Kam so tutuo, Nali kabung go blue lo tandali sesegoy, nemot kalik so sesemu. Nggano Nali kabung lo pu go: Demu Kabui nalo ngga kalik go suey kua. E.....ngge kalik so ya semu-kleyon go. Genam li-silu gono, kui-a ta lo ya kikik nando don ey. Nando don kua. Nggano Demu Kabui nalo lo pu: ko lo-kundo, ya!

Nali kabung li gono, kui way-way so ta lo kit-kletenatun. Nggano Nali kabung lo kabung kaguit no pu go: demu koy yam so koy nebleng kalik so lemoy go iti go li go Demu kabui nalo go kui ba lo betep-bitun. Nggano Demu Kabui nalo lo pu go: ey....ey...ey...namboy genam nebut ya pu! Nggano Nali kabung lo pu go: pu-a! Demu Kabung nalo lo pu: tegan put ba logo, di put ba logo se tup! Sedue go denun mot lo wamoy sogo kua mlue go wawi, genam ngganemot sogoso nemu gabe susup. Nali kabung lo pu go: sup-a!

Kabung kaguit, Nali kabung no pen-tun go, nggano gemang pu: ngga kalik go, ko klong-a, mot go ayanang, mianang mit no. Nggano Nali kabung lo beto neglung ey mintega ey nemot go-a kabung kaguit no iti. Kabung kaguit go-a nemot lo iti. Nggano gemang pen-tugun: mianang, lo mo usi mo genam sogo nebut kua pen. Mo pen go, mot go min ey betodop ey genam lo tandali mea iti.

Nggano natun go, unennang, nglanginnang mit no pung go. Unennang lo senang so usi-neton goso, pen-natun, kabung kaguit bu gluik so natun gono, Nali kabung lo nemot go min tega ey beto neglung ey tandali iti-natun. Nggano nemot yap no bantun. Nggano unennang no gemang pen-tenatun: motnang lo senang so usi goso pen-tu go. Ngganemot nogo nggeasui go genam go betodop ey min ey tandali Nali kabung lo mo iti-natun.

